



DEO OPTIMO MAX.
UNI ET TRINO,

VIRGINI DEI - PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,
*manè discutienda, in Scholis Medicorum, die Jovis secundâ
mensis Decembris, anno Domini M. DCC. XLV.*

M. JOANNE - CLAUDIO MUNIER,
Consiliario Medico Regis ordinario, & Domûs Regiæ
Invalidorum, Doctore Medico, Præside.

An Variolis Balneum?

I.



RS Medica, Ars Divina, omnium veneratione dignissima, ab orbe condito generis humani consuluit commodis, semperque est consultura. Assiduus invigilat curis, ut quâ possit ratione quæ circumstant removeat mala, sanitatem amissam aptis restituat remediis, restitutamque idoneis cautionibus conservet. Tot inter morbos quibus miseri mortales sunt obnoxii, quibus afficiuntur, fatumque subeunt nisi subveniat Ars verè salubris, variolæ apud Gallos præcipuè rabiem frequenter exercent suam. Pueros sæpissimè, juvenes & viros rariùs, senes quandòque ipsos aggrediuntur. Nulli parcunt ætati, nulli sexui, cuicumque periculosa, ætate provectioribus periculosiores. Puellis infensissima sunt, matribusque detestata. Quo frequentiores sunt Variolæ, eò majori

ipsis opus est auxilio. Variis sub speciebus se exhibent, vario igitur modo tractandæ. Si quæcumque vulgò adhibentur remedia, licet in se bona, non omnem in quovis Variolarum genere paginam impleant, unumque olim usurpatum, cæteris additum, tempestivè & methodicè adhibitum maxima attulerit commoda agrotantibus, Artis medendi gloriam sustinuerit, eamque nunc adaugere possit, cur illud terè neglectum ad memoriam non revocem, optimumque non contendam, cùm gravissimâ arcere possit & arceat symptomata, aut ea saltem multùm minuere valeat.

I I.

IN Arabes primùm sævierunt Variolæ; eædem apud nos sæpè verno tempore incipiunt, æstate crescunt, languent autumno, hyeme ferè redeunt. Æstate sunt mitiores, hyeme periculis plenæ: pueros eosque qui huncce morbum nondùm passi sunt, maximè adoriuntur. Variolæ sunt morbus contagiosus, cum pustulis ad pisi mediocris magnitudinem accedentibus, in summâ cute florecentibus, ac in suppurationem abituris, cum febre ut plurimum continuâ, acutâ, sæpè malignâ, gravibusque aliis symptomatibus conjunctus. Variolæ in nothas & veras primò distinguî possunt. Nothæ quasi sine febre prorumpunt ac periculi omninò expertes deprehenduntur. Veræ febre acutâ stipatæ, sunt admodùm periculosæ. Nothæ seu ipuriæ in duas classes iterùm dividuntur, nempe in duras siccas, & in aquosas, quæ hydatides repræsentant, brevî disrumpuntur, siccanturque. Variolæ denuò in discretas & confluentes distribuuntur. Discretæ habent pustulas pauciores, à se invicem distinctas. In confluentibus pustulæ non sparsim sed confertim in facie præsertim & manibus comparent; tam discretæ quàm confluentes dicuntur etiam benignæ vel malignæ. In benignis post eruptionem factam, cessat febris, aliæque symptomata, aut saltem notabiliter remittuntur. In malignis symptomata longè plura, pertinaciora, ac periculosiora videre est. Variolæ malignæ confluentes quibus pustulæ grandiores, elevatae, pellucidæ, ac liquore aquoso-lymphatico, loco puris repletae sunt; indè appellantur crystallinæ. Hic morbus non melius dignosci videtur quàm ex tempore suæ grassationis, ex febre acutâ, pustulis propriis, prægresso capitis lumborumque dolore, quibus accedunt ut plurimum nausæ, vomitus, sopor, capitis gravedo, sanguinis è naribus stillicidium, spirandi difficultas, interdùm colicus dolor atrox, motus convulsivi, sudores magis minusve profluentes, oculi demùm perturbati & ægrè admodùm se aperientes. At non hæc omnia in omnibus, nec simul, sed successivè cernuntur. Die tertio vel quarto ab insultu morbi erumpunt pustulæ ciceris formâ, basim habentes rubram per quatuor alios dies crescunt & implentur, contenta in illis materia albescit, fitque purulenta prorsus octavo die quo revertitur febris remissura sequenti die per auctam faciei molem. Tribus aliis diebus elapsis pallescit rubedo quam circum papulas dabatur conspiciere, denique flaccescunt & exsiccantur pustulæ tribus ultimis diebus, ita ut cadere soleant à duodecimo ad decimum-quintum diem. Hic autem morbus grassatur modò in his modò in illis regionibus ac civitatibus, & cum symptomatibus pro atmosphæræ, locorum & temperamentorum varietate maximè discrepantibus. Hujus genuina veraque causa mali hucusque sollicitos tenuit Medicos, adhuc incognita forsitan in æternùm nos fugiet. Generatim potest accusari miasma quoddam subtile fermentescens, per contagium communicatum: speciatim verò quale sit fermentum funestum hunc producens affectum, non potest determinari. Quodcumque sit, hoc mediante variolosus humor secernitur à sanguine, in glandulis cutaneis deponitur, ibique promovet pustulas ex quarum numero majori minorivè, sede hæc vel illâ, Variolæ sunt leves, curatu difficiles, mortiferae, aut saltem periculosissimæ. Materia morbosica quandoque non potest omninò vacuari

à glandulis; pars hujus moratur in sanguine, undè ad caput partesque internas superiores cum eo fertur, majori discrimine. Hæ enim partes delicatiores facilis affliguntur, perturbanturque. Ex hoc, cerebri inflammatio, hæmorrhagiæ, peripneumoniæ, alvi fluxus, urinæ copiosæ. Hæc symptomata longè diriora evadunt cum fermenti nulla sit evacuatio; tunc suffocatus brevi perit æger ni præstò sit auxilium quod adeò gravia subigere valet incommoda.

I I I.

IN Variolis omne serè periculum esse eruptionem non fieri, aut fieri citius, aut tardius, vel inceptam listi nemo diffitetur. Hanc ob causam quicumque Medici arbitrati sunt cunctos conatus apponendos, ut hæc eruptio, tempore, qualitate, quantitateque convenientibus perageretur. Ast non semper ex proposito sine res succedunt; quædam occurrunt impedimenta quæ vulgaribus remediis non superantur. Hæc sunt rigiditas, densitas, ex spasmò susceptæ, vel ex naturali partium contextu oriundæ; ita ut venenum foras venire nequeat, sed intus furat brevi jugularum ægrotantem. Et verò partes internæ, debiles admodum, longè nobiliores, fermentanti non valent pesti obsistere. Facile tollitur respiratio; sanguis majori quantitate, cursu violentiori, & vitio quodam funesto imprægnatus fertur ad thoracem qui sua munia implere jam est impar. Cerebrum spasmò excitato ita prægravatur ut sui impotens omnino turbetur. Sanguis à partibus superioribus & inferioribus rapido fluxu ad centrum revertitur suum. Perverso demum æquabili ordine, mox ruitura est machina, summi Creatoris opus perfectissimum. Quid molendum, quid agendum in statu tam lugendo? Certè extus propellendum furens intus malum, ut internis partibus liberioribus, externæ magis afficiantur, vitæque fervetur. Sed si conservando vitam, partium externarum pretiosissimæ possint etiam à turpi quâdam deformitate serè immunes effici, num id omittere nefas non sit? Ab imminente labe ut internæ partes liberentur, partes externæ sunt aperiendæ; ut aperiuntur laxandæ & emolliendæ. Extus fieri eruptionem, adeoque variolosi humoris evacuationem, votum est omnium, comprobatum quippè hanc viam naturæ moliminibus esse quàm maximè consonam. Porro ea omnia bona nullâ re magis obtineri possunt quàm ab adhibito Balneo.

I V.

BALNEO cutim laxari, quotidianâ confirmatur experienciâ, nullumque remedium huic fini valentius est. Totam corporis habitudinem afficit, emollit. Porri hujus ope ampliuntur, aut ad minimum resistantiam asserunt minorem exitui mali humoris. Nonne singulis diebus observatur Balneo sudores prolici, copiosas fluere urinas, alvum subduci, cunctas denique secretiones & excretiones faciliores reddi? Illo tumores efficacissimè emolliuntur, & ad perfectam curationem optime præparantur. Illo, sanguis menstruus qui versùs superiora impulsus, dirisissimos variis in locis cruciatibus creabat, ad inferiora derivatur. Quæcumque bona in prædictis occasionibus asserit balneum, eadem certè proferre potest in Variolis: nam in confluentibus, ubi purulenta materia, si retineatur, respirationem tollit, jamque dicta mala excitat; balneum cutim laxando, poros ampliando, resistantiam minuendo, nonne patientiorem, commodiorem, tutioremque evacuationi fermenti viam præbet, undè sanguine qui ad superiora furioso fluebat impetu, ad inferiora detruso, caput sublevatur, respiratio adjuvatur, vitæque serè amissa restituitur. Hæc ratione videntur se convertere: illud tanti est momenti ut teste Sydenhamio eò præcisè minus periculose censenda sint Variolæ: insuper febris secundaria quæ sapissimè corripit ægrum cum Variolæ ad suum pervenire statum, nullo melius remedio antevertitur,

aut saltem minuitur quam Balneo. Præterea si pustulæ quæ apparuerant, statim recedant aut sistantur, ex cuti densiore, aut poris obstructis, crustis jam efformatis, Balneo mirum in modum emolliuntur, cutis laxatur, pori ampliantur, restauraturque virosi humoris eruptio, imprimis si detur simul Cardiacum appropriatum. Hoc denique bonum, non minimum, optatum à puellis, quod Balnei ope materia morbifica, ad inferiora deveniens faciem præstet ferè immunem à maculis horridis sexui sequiori tam formidatis, ut vitam vix servare velint damno formæ.

V.

SAT superque evictum est, Balneum aptissimum esse dirissimis symptomatibus avertendis. An quis objiciat Variolas non rarò salutariter per se exire, Balneumque tunc esse inutile? Nec tunc id suademus. An alius instet Balneo calido crispari fibras, sicque afferri impedimentum eruptioni? Balneum sit moderatè calidum. Objicies iterum, Difficile & noxium pluribus esse Balneum? Et id quidem non dissitemur, neque etiam illud indiscriminatim in omnibus, nec sine cautela admittendum dicimus. Priùs solvenda est plethora, cruditates primarum viarum tollendæ lenioribus Emeticis; expedit non statim immittere totum corpus, sed successivè, primò pedes, deindè femora, postea abdomen usque ad cordis scrobiculum, donec ad mentum ipsum perveniat unda. Servandus etiam æqualis aquæ calor. Non diutius in eâ commorandum, corpus enim nimis diffunderet, viresque debilitarentur. Post Balneum, lecto committatur æger. Perspiratio insensilis, juscule, infuso, decoctove convenienti adjuvetur. Quibusdam Balneum aut semicupium sunt noxia? Ii ad pediluvia Balneorum vicaria, minori apparatu, nullo incommodo, magno è contrà cum emolumento confugiant. Dum enim aqua tepida fovetur pedes, fibræ tendinosæ, nervosæ & musculosæ laxantur, remittuntur. Pori & tubuli antea contracti ampliantur; humores quicumque faciliùs & promptiùs ad extimos corporis tubulos feruntur; subtilissimarum foridum ut & portionis miæsmatis sit diffusio atque exhalatio, toti denique massæ liber circuitus conciliatur.

Ergò Variolis Balneum,

DOMINI DOCTORES DISPUTATURI.

M. Jacobus-Franciscus le Chat

M. Petrus Lalouette.

M. Thomas-Bernardus Bertrand,

de la Sourdière.

M. Joannes-Franciscus Isèr,

M. Silvester-Antonius le Moine.

M. Camillus Falconet, Salubris
Consilii Regii Socius, & è Re-
giâ Inscriptionum & Numisma-
tum Academiâ.M. Carolus-Franciscus Boutigny
des Preaux.M. Petrus-Josephus Macquer,
è Regiâ Scientiarum Acade-
miâ.M. Hyacinthus-Theodorus Baïon;
Antiquus Facultatis Decanus.

Proponebat, Parisiis **JOANNES-FRANCISCUS PARIS**, Parisinus,
Theſor. author Saluberrimæ Facultatis Medicinæ Parisiensis Baccalaureus, A. R. S. H. 1745.
à sextâ ad meridiem,